

馬關縣志

惺庵題簽

卷
柒
上
冊

藝
文

馬關縣志

周鍾嶽題



馬關縣志卷柒

藝文志

縣長張自明輯

勝地名蹟必湏記錄詠歌始足以資考徵而廣傳揚者吾邑地近陵岡風氣滯塞雖文化較遲而詩書碩彥之士代不乏人凡地方之沿革政治之設置亦多著述而古蹟之重要風景之清佳則不少詩歌雖不能賦比三都亦勉追詩成七步矣畧錄大雅以備採風志藝文

疏
詔令

馬關縣志

卷柒

藝文志

一

雲南德生石印局印

說
記
文書論
傳
序
碑
詩
賦
詞

詔令 藝文志之一

唐明皇勅安南首領歸州刺史爨仁哲書

勅安南首領歸州刺史爨仁哲潘州刺史潘明威獠子首領阿
廸和蠻大鬼主孟谷悟姚州首領左威衛將軍爨彥徵將軍昆
州刺史爨歸仁南寧州司馬盛州刺史都大鬼主爨崇道昇麻
縣令孟聘卿等雖在僻遠各有部落俱屬國家並識王化比者
時有背叛以是生梗及其省察亦有事由成都府不平處置有
失哉朋讐相嫌經營損害既無控告自不安寧兵戈相防亦不
足深怪也然則既漸風化亦當變俗有須陳請何不奏聞番中

馬關縣志

卷柒

藝文志

二

雲南德生石印局印

事宜可具言也今故遣掖庭令安道詣彼宣問並令口具有不
穩便可一一奏聞秋中已涼卿及百姓以下並平安好遣書指
不多及

明太祖諭征南將軍穎川侯永昌侯西平侯勅

舊歲命爾等率甲士三十萬南征諸夷兵臨普定如風行草上
所以去後還致有小疵及至入雲南之域擒首帥於曲靖之西
敗烏蠻於可渡之北席捲豪英長驅於碧鷄金馬來云已駐牂
牁未幾捷音摧堅敵於點蒼山下而撫金沙邏邏心悅者其金
齒不戰而率土以歸於是雕題之蠻聞知即遣使入貢以再而

獻生口檄從百夷之種威來八百之邦將軍其勞至矣然功並
亙古勲著彤庭英風徧播於中外丈夫至是豈不以顯父母揚
名聲者耶今也勤勞既多欲勞以酒奈山川險遠速不及赴特
以朕心勞之故茲特勅諭

清廷訓飭大學士九卿文

諭曰昨奉使安南之副都御史杭奕祿內閣學士任蘭枝回京
復命朕召見之際備問安南地方風土據奏彼處人民蕃庶畜
產饒裕朕聞之甚為欣羨兼以自愧於中蓋安南特海濱一隅
之地耳而能如此朕臨御天下中外一家早夜知之勵精圖治

惟期四海之廣兆民之衆人人各得其所皆俾安居樂業共慶
豐盈風俗淳龐家給人足以臻唐虞三代之盛乃宵旰勤求已
歷數年而茲心未能如願此所以聞遠邦之風土而愆然抱歉
也自古太平郅隆之世必由明良合德君臣交勉今朕以寔心
行寔政不自暇逸中外諸臣可勿精白乃心謨猷入告共贊久
安長治之盛美乎朕秉性虛公樂聞善言凡諸臣陳奏之切中
事理可以施行者無不備為採納寔能從善入轉圜乃朕之出
於至誠可以自信者也諸臣何不各抒其誠以責難陳善為事
君之正道乎即如近日勾留各省罪犯關係至重必當揆諸天

理人情至當在朕原無成見期與內閣諸臣悉心酌定乃朕咨訪之時每見學士塞楞額德新回奏尚有迎合之心塞楞額德新皆係讀書之人豈有人命至重可以迎合上意而不據理陳奏者乎從來執法之人皆秉公持正即如以鞭撻加人偶然迎合尚且不可而況勾決之重務乎人臣事君必以至誠感孚稍或有意迎合其舉動詞氣之間必昭然可見不可掩也豈若刑部為刑名之總匯所定案件惟在得其至平若有意從寬與有意從嚴皆為不可每見刑部於外省督撫所擬過嚴之處皆即照議覆奏不行駁正似此則何以持天下之平乎督撫意見不

同或偏於寬則刑部當濟之以嚴或偏於嚴則刑部當濟之以寬總期於法不枉縱於理無偏陂而後可也朕惟欲中外諸臣共相黽勉一德一心贊襄罔斲庶幾海宇乂安民氣和樂賑日夜勤求治理之意可暢然而大慰矣

又諭雲南等省所有苗蠻儂獞種類甚多殘忍性成逞兇嗜殺剽掠行旅賊害良民又或販賣人口捉富勒贖所以為內地人民之害者不可枚舉而眾苗之中又復互相讐殺爭奪不休於其所轄土民則任意傷殘草菅人命此皆天下所共知者自朕即位以來內外諸臣條奏苗蠻不法不可勝數而邊省督撫提

鎮等又復屢屢陳奏朕念普天率土之民皆吾赤子豈肯令邊省蒼黎獨受苗人之侵擾而苗眾繁多朕亦不忍聽其獨在德化之外是以從封疆大臣之請勦撫兼行而切加訓誨務以化遵招捩為本不可脅以兵威或致多有殺戮屢頒諭旨甚明今幸數年之內苗人陸續歸誠者甚眾將來可望地方寧謐但官弁士卒跋涉於深林密箐之間歷險峻之區染瘴厲之氣而苗性狡獪反覆當用兵之際往往詭詐負嵎出其不意以致官兵受傷亦間有之事夫弁兵受國家多年教養之恩雖臨陣捐軀義不避難但以蠢然無知之苗蠻而致捐我義勇之士卒若計

算得失不足相抵朕心深為憫惻除已降旨賜恤賞賚外其雲南貴州四川剿撫苗蠻之官弁兵丁從前若有預備銀兩俱免其還項陣亡之官弁兵丁著照陣亡例加倍賞給銀兩俱交與鄂爾泰兵鍾琪各於所屬額兵查明動支公帑遵旨賞賜務俾均沾實惠以副朕優恤弁兵之至意

高宗純帝諭

國號乾隆

諭曰文以載道與政治相通故二帝三王之盛在廷敷奏及宣諭眾庶之言皆為謨為詔炳著六經西漢治猶近古人心淳樸故見於文者原本經術指事類情質實曉暢猶有周人之遺降

及魏晉以文滅質漸就浮靡六朝尤甚姿態益工意格益陋文運所關非淺鮮也學者修辭立誠言期有物必理為布帛菽粟之理文為布帛菽粟之文而後可行世垂久若夫雕文邊詞以炫一時之耳目譬猶搏土揭木塗飾丹鉛以為器物外可觀不移時而剝落曷足貴耶國家累洽重熙之日務學積文者正宜沐浴教化爭自濯磨漸進於大雅勿尚浮廉忽取姿媚斯於人心風化有所裨益至於古人臨文原無避諱誠以君取足志一存避諱之心則必展轉囁需詞不達意嗣後一切章疏以及考試詩文務期各展心思獨杼杼軸從前避諱之習一概掃除尤

宜禁者鄉會兩試考官每因避忌字樣必摘取經口中吉祥之語為題遂使士子易為揣摩債人代作臨場抄寫以致薄植之少年得以倖取科名而積學之老生無由履於底蘊嗣後凡考試命題不得過於拘泥俾士子殫思用意各出手眼以覘實學特諭

又諭士為四民之首而大學者教化所先四方於是觀型焉比者聚生徒而教育之董以師儒舉古人之成法規條亦既詳辨矣獨是科名聲利之習深入人心積重難返士之所為汲汲皇皇者惟是之求而未嘗有志於聖賢之道不知國家以經義取

士使多士由聖賢之言體聖賢之心正欲使之為聖賢之徒而豈沾沾焉文藝之末哉朱子同安縣諭學者云學以為己今之世父所以詔其子兄所以勉其弟師所以教其弟子弟子之所以學舍科舉之業則無為也使古人之學止於如此則凡可以得志於科舉斯已耳所以孜孜焉愛日不倦以至於死而復已者果何為而然哉今之士惟不知此以為苟足以應有司之求矣則無事汲汲為也是以至於惰遊而不知返終身不能有志於學而君子以為非士之罪也使教素明於上而學素講於下則士者固將有以用其力而豈有不勉之患哉諸君苟能致思

於科舉之外而知古人之所以為學則將有欲罷不能者矣觀朱子此言洵古今通患夫為己二字乃入聖之門知為己則所讀之書一一有益於身心而日用事物之間存養省察闡然自修世俗之紛華靡麗無足動念何患詞章聲譽之能奪志哉況即科舉亦無礙於聖賢之學朱子云非是科舉累人人累科舉若高見遠識之士讀聖賢之書據吾所見為文以應之得失置之度外雖日日應舉亦不累也居今之世雖孔子復生也不免應舉然豈能累孔子耶朱子之言即是科舉中為己之學誠能為己則四書五經皆聖賢之精蘊體而行之為聖賢而有餘不

能為己則雖舉經治事而督課之亦糟粕陳言無裨實用浮偽與時文等耳故學者莫先於辨志志於為己者聖賢之徒也志於科名者世俗之陋也國家養育人材將用以致君澤民治國平天下而囿於積習不能奮然求至於聖賢豈不謬哉朕膺君師之任有厚望於諸生適讀朱子書見其言切中士俗流弊故親切為諸生言之俾司教者知所以教而學者知所以學

疏藝文志之二

安南國王黎惟禱謝恩疏

奏為俯敘愀忱仰祈睿照事雍正五年十一月六日奉總督雲貴委差魏千總賚頒勅諭交與臣飭委差員目阮仲意等接領十二月二日賚回到臣臣望闕遙拜焚香盥讀再三披閱喜懼交併臣謹披瀝赤誠備敘巔末仰日月垂照俯鑒微衷臣竊照臣國渭川州與開化接壤原來以賭咒河為界即馬白汛下之小河正如前督臣查冊諸汛防所共稱也臣國邊目世稱守土臣先祖父及臣罔知侵佔內地為何等事且朝廷初清疆界於

馬關縣志

卷柒

藝文志

九

雲南德生石印局印

臣未奉詔書是以臣備因陳奏欽奉勅諭令撤回斜路村等處人員別議立界之地仰蒙天日旁照欽幸無涯繼奉勅諭定於鉛廠山小河立界諭臣勿恃優待之恩懷無厭之望自干國典臣咫尺天恩彌深未谷臣仍虔具奏章備陳情愫冀以自明投於兩廣雲貴總督求為題達詎意並見發還臣惟戰戰兢兢恭恪以俟目今鉛廠山界址即斜路村之地去年未奉勅諭之前廣南知府潘先已到此關門設矣房屋築矣界碑豎矣防汛置矣臣國邊目土目遵臣嚴飭帖然拱咱臣亦何嘗敢有越違也臣竭誠累世向化聖明蒙聖祖仁皇帝柔懷安勸六十餘年今

逢皇帝陛下新膺景命如日方升臣遙宅龍編阻趨螭陛欽蒙
天恩優渥曠典覃施揣分奚堪喜逾望外臣非木石豈不自知
但愧遐蹤無階報達且薄海敷天莫非臣土矧此四十里地何
敢介意於其間而有所缺望也今奉綸音曉諭誠切真天覆地
載之為心春育海涵之為量臣感戴聖恩不勝欣躍歡忭之至
臣謹具奏聞

請蠲貢金疏

巡撫

沈儆爝

歸安

臣奉命撫滇數月以來日孳孳焉惟弭盜安民是急顧四郊多
壘大盜縱橫征撫之文與剿撫之檄交發互馳筆幾為禿而反

馬關縣志

卷柒

藝文志

十

雲南德生石印局印

側難馴期以弭盜而盜未必弭也戒諭有司釐去弊蠹蕩滌煩
苛念念思與民更始而天災流行霖雨為虐登城一望四野沮
洳期以安民而民未必安也盜未弭則添兵添餉勢不能免民
未安則焚林竭澤困不能支況可以遼餉故有每畝九厘之加
派耶滇土府土州土縣壤地千里小者數百里所輸僅差發銀
二三十兩多者五十兩或百兩而止其流官州縣得數百金遂
了一州一縣之額若歲入有一二千金者便以名城巨邑稱矣
譬之一貧家析薪數米常懼不能糊其口一羸夫朝饔夕飧常
懼不能必其命今欲少留涓滴以活滇人之命則惟有請蠲貢

金一節而已夫白王上取金於滇豈以金為滇之所產耶不知商民裹糧重繭遠覓之秦隴近覓之巴蜀甚有至京而反用高價易之以進者至於金價之所從來尤有不忍言者或取之汰軍或取之撈刮或取之閭閻或取之口民之賠累吮血推膚呼天搶地皇上不得而知也如以為不可缺則隆慶以前原額止二千兩隆慶四年始增三千時以撫目曹三暘按臣許大亨之奏穆宗皇帝慨然停止萬曆十年增金一千時以撫臣劉世曾按臣董裕之奏我皇上亦慨然停止則知金可有可無之物也以可有可無之物早為停止而況又加之遼餉之急耶惟盡行

免解或止解原額二千停止續添三千少留滇民餘力以供九厘之加派少留滇餉萬一以救多兇多懼之危疆臣度眼前光景金價決無所出來歲貢金決不能辦臣惟有與地方諸臣席藁以待斧鉞爾已

請減屯糧疏

巡撫

石文晟

奉天

為密陳屯糧之重仰祈睿裁以廣皇仁事竊惟經國必先裕課體野端在足民故正賦自貴充積而民瘼亦當痼瘵臣本庸陋世受國恩蒙皇上曠典以郡守末吏不次優陞特簡滇撫叨此邊疆重任敢不竭盡駑鈍以報高厚故自蒞任以來諮詢地方

利弊體察吏治民生其間之生聚殷繁安藝樂業熙熙皞皞如入時雍之世此皆皇上聖德滂流所致惟是猶有重困於民者不敢不以上聞也查滇省屯政因明初沐英世鎮將南將帶來官兵分作十分以三分差操七分屯糧即以七分屯糧之兵養三分操軍此即古之寓兵於農原非上倉米糧可比迨我朝定鼎順治十五年闢滇吳三桂遂將昔日之租改為額徵之賦及後變亂之時罔恤民艱任意坐派使各軍紛紛逃散因而遺累存下典鬻賠納苦難殫述幸賴皇上天威殄逆民得以安但浮糧過重仍重輸將計恢復之後自康熙二十一年至二十七年

屯銀米谷等項歷年拖欠此非軍戶敢於頑抗亦非各官不善催科總因糧額太重血比難完業於康熙二十八年內經前督臣范承勳署巡撫時特疏題請分年帶征隨蒙皇恩特頒上諭朕念雲南百姓前曾供億王師繼又遷移叛屬家口運送勞瘁本年正賦輸將尚屬艱難復令帶征逋租必致益滋困累酌將歷年所欠屯賦七萬一千二百餘兩米麥等項十萬七百餘石盡行蠲免以示軫念民生至意欽遵在案則彼時題請帶徵早蒙皇上睿鑒中矣況各衛所久經裁歸有司是在前日猶存軍戶之名在今日則無軍民之別一切徭役自應一視同仁乃查

通省民賦上則田糧最重者莫如河陽縣每畝八升一合八勺三抄其餘五六升以至四五合而止上則地稅最重者亦莫如河陽縣每畝五升九合二勺一抄其餘三四升以至三四合而止及查屯田每畝則有七斗二升六斗八升五斗六升至四斗五六升不等屯地每畝亦有三斗八升至一斗五六升不等夫軍民田地阡陌相連肥磽相若天時人事耕鑿播種亦無不同何至輕之屯額比至重之民賦尚有四五倍之數若較輕額則屯賦之與民賦竟有十倍之重所以屯軍終歲勤動所收之穀不遑瞻顧父母妻子惟事納糧而究竟不能以一畝之出全完

一畝之額數康熙二十八年臣叔石琳撫滇時曾於奉旨編輯全書案內將此屯糧重困敘入瀝陳未經部覆而以後督撫臣未敢復請者蓋以國用浩繁豈容遽議輕徭況各省屯糧皆重尤不便獨為請減是以前撫臣王繼文不得已於康熙二十九年有屯荒減則貼墾之請也但浙江等省屯軍現今領運且有船隻行月漕截等項給贍滇省屯軍則無此項贍養兼之衛所既裁軍即是民則與別省迥異況此軍係沐氏帶來官兵並非發遣有罪之軍所納正供似應與民一體矜恤臣於康熙二十二年守開化時早已深悉今撫茲土見煙竈相連林林總總生

聚實繁大非昔日氣象此雖邇十以來前督撫臣撫綏之功寶沐皇上柔遠洪恩所致惟此一項因吳逆作亂時各軍多半逃竄殲逆之後前此逃丁或遭兵火或戀他鄉間未回里以致貽糧賠累本以最重之糧又復包貽逃戶日復一日重復更重故於康熙二十八年以來歲歲不清每遇奏期各官俱愛功名竭蹶借墊者有之以次控完者有之遇一陞遷事故便束手無策百計哀求逢人募助洵不可悉數也臣自入境以來目睹荒蕪田地甚多百姓甚重及抵任後披閱各屬詳驗報墾無幾隨行飭催旋據百姓紛紛具呈熟糧額重無力開墾懇請題減復批

馬關縣志

卷柒

藝文志

一四

雲南德生石印局印

司道查詳所議僉同總欲為民請命臣思減賦薄稅非臣子所敢輕議祇固多寡之數甚是不侔苦樂之形異常各別若不據實上達負百姓即負我皇上矣況滇省僻處遐荒係外域觀瞻之地不得不冒昧陳請如荷聖鑒將此屯糧悉照河陽縣則例起科則不特現在軍餘易於輸納即未墾荒產臣自鼓勵各方官加意勸墾亦無有不躍躍樂墾者也仍將墾過數目隨即具報按年科徵是減賦於今日安知不增於將來也理合恭疏題請

酌定全滇營制疏

總督

蔡毓榮

奉天

滇省東接東川而連猛緬北距蒙番南達安南四圍邊險而中間百蠻錯處如猓獠僂人野苗等種類繁多最為叵測故無在非險要之地無地不需控馭之兵臣等量地設防從長佈置務使無事分扼要害有事倚角相援然後可經久而無患如迤西舊設三鎮內鶴麗一鎮通臨西域控制金江獨當一面自應復設仍駐鶴慶永順一鎮守在天末地交緬甸並屬要區自應復設仍駐永昌查永順鎮兼轄之騰越一協順雲城守一營今遵部議覆設無庸更議鶴麗鎮江汛綿邈緊隘甚多設兵工千四百僅定濱江守禦二郡彈壓其他要汛勢難兼顧查劍川州逼

近石鼓一帶地方界接蒙番為迤西藩籬要地應設協守副將一員守備一員千把總六員兵一千名駐劄劍川聽鶴麗鎮兼轄扼迤西之門戶壯鶴麗之聲援所最急也永汛一鎮原由楚姚蒙景改為鶴麗永北既又曰鶴麗分為永北彼時楚雄設有援勦前鎮洱海設有援勦後鎮故永北鎮與北勝協同駐州城今援勦鎮營既裁則楚雄乃迤西九府咽喉且左有蒙化景東右有姚安接通建會而楚屬南安等處又係野賊剽劫之鄉誠為喫緊應以永北鎮改為楚姚蒙景鎮移駐楚雄控制姚安景東蒙化以北勝協改為永北協仍駐北勝州控制永寧土府並

歸鶴麗鎮兼轄以一邊汛之事權而資環江之調度其洱海當迤西孔道楚姚蒙景鎮統轄四府鞭長莫及若非另設官兵則一路塘汛虛懸而地方廣野無備應設叅將一員守備一員千把總六員兵一千名駐劄洱海聽楚姚蒙景鎮兼轄為表裏之捍禦通內外之呼吸又最急也迤東舊設四鎮內開化一鎮向以羈縻之域改為節制之區叢山深箐接通交趾最稱邊隘亟賴重兵自應復設仍駐開化臨元澂江一鎮當四達之要會控三府之遐陬苗蠻錯雜難防野賊出沒為患自應復設仍駐臨安查開化鎮向無兼轄協營臨元澂江鎮兼轄之元江一協新

習守備一營今遵部議復設無庸更議曲尋武霑一鎮向駐尋甸控制曲武二府霑益一州復因汛廣隘多土司黠悍故武定仍設援勦左鎮曲靖仍設援勦右鎮今既奉裁則曲靖乃黔楚通衢滇中東北門戶應將曲尋武霑鎮移駐曲靖但自曲至尋一路險僻自易隆抵普安衛數站要衝而尋城密邇東川有樹撒秧田功山矣吳打烏等十數隘口俱關利害雖有兼轄之尋霑遊擊一營而霑汛荒廣猶苦兵單計合鎮營之兵不能兼顧武定查武定接通建會有他頗普度撒馬等隘而祿勸則連撒甸猓羅元謀則通金江有矣資等隘亟須守險且武汛上至祿

豐接楚雄之塘下至安寧接雲南城守之塘若不另設官兵何以分汛應亟設叅將一員守備一員千把總六員兵一千名駐劄武定並聽曲尋武霑鎮開轄謹東北之藩籬為曲尋之指臂又最急也廣羅一鎮原駐羅平控制廣西廣南均屬要地但前六鎮既已難裁故臣等於無可裁之中仰遵廷諭酌量裁此一鎮惟是各鎮勢難兼併而一州二府未便聽其甌脫且羅平路通黔粵汛接安籠四境遼闊彌勒十八寨為土夷之藪時有跳梁應改設協守副將一員守備一員千把總六員兵一千二百名仍駐羅平兼控廣西其廣南瘴癘之區直接泗城思恩等處

而皈朝皈順富州一帶儂人野類叛服不常且由皈朝以達架村直通交沚協兵未能兼制應設遊擊一員守備一員千把總六員兵八百名駐劄廣南聽羅平協兼轄此又視鎮兵較減而於各地必需者也以上除六鎮暨原設協營之外凡應改設增設官兵皆臣等身在地方審量形勢萬難缺少使其間稍有可輕可緩之處又何敢糜有用之餉安置無益之兵且雖有增設之名而較之滇省舊日官兵已多減省亟請皇上俯鑒邊圉初復非比腹地承平日久可以輕議裁兵之時務期佈置萬全特允臣等所請早定經制於以建威消萌久安長治無難矣

進呈編輯全書疏

臣看得全書上關國課下係民生奉旨今詳察細閱有無應行更改增刪明白確議具奏仰見我皇上愛民為心四海為家誠恐沿習既以有不便於民之處更改增刪為萬世不易之章程也臣安敢不兢兢矢慎以仰副宸衷惟是滇南僻處邊陲禹貢列諸要荒之服宋祖棄諸玉斧之外我朝定鼎無遠弗屆自順治十七年歸入版圖其賦役大概準諸明朝之制而因襲之後因吳逆鎮滇剛復自用擁兵加賦以致民不堪命今幸聖政維新重賻天日臣接部咨行司道府會議前來臣又採訪輿情考

稽舊籍其亟應議減刪除者有八焉一全滇屯官田畝之糧過重宜減也按明初沐氏鎮滇置設衛所將三分軍為差捺七分軍為屯田即徵租以養軍又有名為官田者給指揮等官為俸食聽其招佃收租計官屯田地每畝科租自二斗至四五斗不等較民賦之每畝三四斗至五六七八升不等者則十數倍矣蓋當年以軍養軍原非上倉糧米猶之佃民之納租於田主也迨我朝開滇以來兵威震疊將明時指揮等官裁為廢弁軍餘改為編民其時吳逆暗握邊權按昔日之租額改為正供之糧額相沿至今積逋愈多每年業將未完分數職名疊次冊報題

叅降革罰俸勒口嚴催在案計自康熙二十一年起至二十六年止新舊帶徵共計未完丁折銀六萬二千九百八十餘兩未完米麥穀豆一十三萬四千五百七十餘石差檄交催法盡計窮究竟完報無幾豈真官吏罷玩軍餘抗逋者乎總緣屯官田地與民田接壤相攙其地利高下天時雨澤人力播種事勢皆同而糧賦輕重各異況雲南原係山土瘠薄之區刀耕火種之地較之蘇松膏腴田地所稱財賦半天下者額重亦不至此大為官民交困今議將新舊裁併屯賦錢糧除草場地租馬場人丁學租照舊徵收外其寔在田地照分歸州縣民賦上則例起

科計寔徵銀一萬九千四百九十三兩零正耗米二萬三千七百二十一石零正耗麥三千四百一十六石零於全書內更改者也一黑白二井鹽課過重宜減也查全滇鹽政考內鹽井有九除阿陋等六井年該課銀一萬六百四十九兩三錢六分井少課少辦納猶易不議外查明時黑井額課二萬六千六百餘兩白井一萬五百餘兩瑯井二千四百餘兩此辦課之舊額也自投誠偽總兵官吏文開報黑井課銀九萬六千兩每觔徵銀一分六厘白井課銀二萬八千五百六十兩每觔徵銀八厘瑯井課銀九千六百兩每觔征銀六厘此係明末亂時額外橫加

較原額不啻數倍矣滇之竈戶從井汲滷始方鍋煎其柴薪背負肩挑人力工本所費既繁又復加以重課則竈困矣行鹽之商率皆朝謀暮食之人非若淮浙巨商挾重貲而行運也且駝運於崇山峻嶺腳價倍費豈能捐本而賤賣則鹽價貴而夷獠遂有經時不知鹽味者矣即如浙鹽課價上則每觔不及二厘下則不及厘許又如附近之川塩每觔只完稅六厘八絲同一鹽課何與滇省之課輕重懸殊若此也又查山東福建四川貴州廣西等省雖省分大小不同鹽課多寡不一而滇省僻處天末環夷褊小之區不惟不能與小省之課同例而且倍多於大

省此滇民之甘心食淡地方官之不能督銷者職此故也今議以黑白二升照瑯井每觔六厘之例黑井除減川額外歲徵銀三萬三千八百四十兩白井徵銀二萬一千四百二十兩瑯井徵銀九千六百兩并阿陋等六井徵銀一萬六百四十九兩三錢六分共課銀七萬五千五百九兩三錢六分遇閏加銀六千二百九十二兩四錢四分零於全書內更定者也一開化府之加糧過重宜減也按開化僻處萬山界連交崗猓夷環襟回肄臨安府轄九土司中之王弄安南教化三長官地地也明時分隸蒙自阿迷師宗維摩等州縣於康熙四年土酋王明等之作

叛吳逆勦平編為八里委署臨安知府曹得爵勘文額四七百五十九頃三十五畝六分零不照民田科則每畝科米一斗六升三合共科正耗米一萬二千八百石四斗五升三合零載入全書查通省民糧惟河陽縣上則田每畝徵米八升一合零為滇省最重糧額矣今開化比河陽又加一倍昔年未設府以前在蒙自等州縣每畝不過二三升及政府之後驟加如許同是此畝田地不過改州隸府何至今昔懸殊夷民苦累今議將開化府錢糧除人丁條編差發課程商稅等照舊徵收外其原額田酌量改照河陽縣之例共徵本米六千二百一十三石八斗

一升二合一勺九抄每石仍帶耗三升於全書內更改者也一元江府新增糧米過浮宜減也按元江舊置三府地處極邊四面環夷種類迥別地皆崎嶇山谷田畝免丈每年認辦米一千九百三十石二斗一升零地畝銀二百二十兩一錢九分零附額徵花斑竹差發二項共銀六百二十一兩一錢七分零商稅銀三十五兩二錢自改建流府編為六里其時官兵駐防糧運不繼吳逆遂令暫為設法於額糧之外新增米四千七十石二斗一升零田錢地講銀五千五十三兩二錢三分六厘茶商稅銀一千六十四兩八錢普洱無耗秋米一千八十四石浪媽等

六寨地租銀二百八十五兩查元江屢遭殘破之後犛梵不遺何能辦納驟加數倍之糧遂至荒殘愈甚今議將該府夷糧除原額銀米商稅照舊徵解外其新增銀米各減一半寔徵新增並原額米共四千五百六十五石二斗二升零地講浪媽并原額差發等銀共四千六百一十兩四錢九分零於全書內改正者也又一通海縣夷糧及南安州附徵裁併硿嘉縣條編宜減也查通海六寨田地五十七頃七十二畝零額徵糧一百六石五斗九升三合每石科銀三兩七錢六分有零較該縣民賦寔重二倍夷民困苦難堪今照議新定民例科則寔徵銀一百一

十二兩六錢二分零米八十三石二斗九升零麥二十三石三斗零以昭畫一硿嘉縣原額田四十八頃八十八畝三分零共徵秋糧一百三石五斗六升四合零每石編銀四兩二錢四分零共徵銀四百三十九兩三錢九分零較全滇之額固屬偏重今既歸南安州附徵應將硿嘉縣條糧照該州每糧一石編銀一兩四分零之例寔徵條銀一百七兩六錢七分零米一百三石五斗六升四合零均應於全書內刪改者也 一麗江土府失額銀米宜免也查麗江界連吐番古稱荒服原額米七百七十四石一斗三升零麥一千六百三十九石五斗六升零地畝

銀二百七十五兩三錢五分零外認納條編銀五百三十兩一錢後因蒙番出犯將該府所轄金沙江外中甸地方侵佔其中甸等處額徵米一百四石六斗八升零麥四百五十八石五斗一升零已於康熙十年題豁免徵迨吳逆反叛又將金沙江以內喇普地方割送蒙番該秋糧二百石編銀六十六兩四錢三分久經無徵該土官賠補將來賠累無窮且未便將無地之糧仍載全書況中甸業經免徵則喇普亦應援免今議應於全書內刪除者也又一建水州無藝之徵宜革除也查明時設臨元叅將一員將日用等物派諸夷民計歲派村寨年例銀九十三

兩及子花檳榔核桃松子木耳乾筍麻子油月柴每年變時價銀二百三十四兩四錢一分零又派馬料八十石一斗零糕糧二石厚非正供錢糧寔係私派橫徵因吳逆揆查投誠知府范應旭呈報邀功遂編入額豈可因仍陋弊今議應於全書內刪豁禁革者也又一無徵之場課宜豁也查新平縣明直銀場易門縣老場銅廠自明至今開採年久今苗斷礦絕商匠逃散課稅無徵官民賠累不堪經_臣援詔具題部議未允但礦廠非同田地有耕有穫乃全憑造化有無難必今既洞老山空而課稅不免節年俱係各官捐賠但年復一年焉知不派累小民豈可

以賠補之項刊載全書今議將新平之明直場課銀三百三十兩九錢六分遇閏加銀二十七兩五錢八分易門之銅課銀二兩老場爐課銀二十一兩六錢一併於全書內除免者也以上各款如屯賦之太重乃明清之相沿但時異勢殊軍既為民衛所既併州縣而壓欠歲積官民交界又加鹽課之過重商竈困於征輸夷民苦於淡食又如開化之加糧元江之新增乃吳逆邀功橫征麗江之喇普失額銀米係吳逆割送蒙番以及建水之私派亦係吳逆摻查貽累通海南安二州縣之重糧及新平易門之明直老場荒廢貽課今當更造全書聖諭諄諄惟恐一

天不得其所此正邊境黎民猶解倒懸之日也臣道旨會同經管錢糧諸臣再四參酌敬陳各條恭候聖裁以垂永久再照石羊等廠歲有額課但苗曠之有無難期永遠今雖造報似未應刊入全書仍照舊每年將抽獲之課造冊報銷可也

和碩怡親王等奏疏

安南國王黎惟禱奏本感恩悔過情詞恭順其定界之處已敬謹踴躍遵奉聖旨仰見我皇上威德宏敷遠藩向化而其中情節更早在聖明洞鑒之中臣等不勝欽服懽忭謹遵旨擬寫勅諭與安南國王賞以四十里之地伏候皇上訓示臣等愚見從

前既差大臣二員前往安南料彼國早已聞知今若中止恐外國不免疑懼況蒙皇上格外隆恩賞賜地土似應仍令杭奕祿任蘭枝賚往彼國宣諭聖意彼必倍加歡慶至所領勅諭應令兵部差人賚付杭奕祿等庶免中途擔誤恭候命下臣等馳信雲南廣西與鄂爾泰杭奕祿等知之

說藝文志之三

藉田說

禮之有藉田也明仁也教義也以天子之尊而必親耕則天下之為農者孰不勤於耕此天子之仁愛天下而使之務本也以天子之尊而必親耕以供粢盛則天下之為子者孰不勤於養親此天子之孝先天下而使之養親也所以教孝也月今有之曰孟春之月天子乃以元日祈穀於上帝乃擇元辰天子親載耒耜措之於參保介之御間率三公九卿諸侯大夫躬耕帝藉天子三推三公五推卿諸侯九推反執爵於太廟三公九卿諸

侯大夫皆御命曰勞酒謹按元日上辛也元辰郊後吉日也日以千言辰以支言立文也則是躬耕之典當行於祈穀之後而同在孟春之月也考之周禮天官甸師掌帥其屬而耕耨王藉以時入之以共粢盛此即天子之藉田而甸師掌之者也然藉田不獨天子有之諸侯亦然祭義曰天子為藉田千畝冕而未紘躬秉耒以事天地山川先王以為醴酪粢盛於是乎取之敬之至也是故千畝百畝之數此天子諸侯之視為等級而其躬耕以致敬則一也祭統曰天子親耕於南郊以共粢盛王后蠶於北郊以共純服諸侯耕於東郊亦以供粢盛夫人蠶於北郊

以共冕服天子諸侯非莫耕也王后夫人非莫蠶也身致其誠信誠信之謂敬敬盡然後可以事神明此祭之道也是故南郵東郊之殊此天子諸侯視為分別而其親耕以致誠信則一也後世躬耕不行藉田漸廢周宣王不藉千畝虢文諫曰夫民之大事在農上帝之粢盛於是乎出民之蕃庶於是乎生事之共給於是乎在協和輯睦於是乎興財用繁殖於是乎始敦龐淳固於是乎成觀於此語而知藉田之義廣矣大矣漢文帝二年詔曰夫農天下之本也其開藉田朕親率耕以給宗廟粢盛夫文帝漢之賢君也此禮既舉後之明主亦猶能踵而行之然唯

天子行之畿內天子而下無復有議及者幾比於繁纓大輅之不可請近代郡縣大者不惟比於古公侯之國而小者亦遠勝於子男之邦則藉田之禮皆所當行乃不惟郡縣不惟督撫及天子亦不能歲舉此禮即使歲舉此禮而邦畿而外雖公卿大夫鮮有能講明其義者今聖天子特舉躬耕以為天下先自督撫以及郡縣州衛所等官凡在守土之司通行耕藉之禮此誠千古未有之曠典也臣身為總制兩省封疆一身表率況滇黔在萬里之遠僻近蠻荒一旦躬逢盛舉不獨山農野叟實所未聞即縉紳士夫亦無從考覈臣不揣庸陋用表彰其義著為籍

田先農二說宣示僚屬遍告農夫使知我聖天子本此仁孝之至推廣誠敬之心而其所以為天下臣民祈天承命以同享夫萬邦屢豐之慶者其用意深且遠可不共殫其仁孝誠敬之心以奉聖春而答天庥哉至於耕藉儀注已詳於會典位有尊卑禮無二致可仿其意而行之無所容未議也臣謹稽首而為之說

先農說

鄂爾泰

藉田之禮宜祀先農夫先農何神也始於何時神位宜如何書壇設何所涓吉何日陳設何器祭享何品樂奏何章既躬親其

事敢先考正其說試為畧言之古聖王之制祭器也法施於民則祀之是故厲山氏之有天下也其子曰農能殖百穀周棄繼之故祀以為稷此祀稷之始也共工氏之霸九州也其子曰后土能平九州故祀以為社此祀社之始也而郊特牲稱天子大蠟八先嗇一神農也司嗇二后稷之官也農三古之田峻有功於民者也郵表畷四郵亭之舍標表田畝田峻居之以督耕者也貓虎五貓食田鼠虎食田豕皆有功於稼者也防六水庸七防隄也以蓄水亦以障水水庸溝也以受水亦以洩水皆農事之備也昆蟲八螟蝗之屬害稼者也是故蠟之祭有八皆以為

農而以先嗇為主蓋以神農為八神之主此祀農之始也斑固食貨志又從而申其說曰闢土殖穀曰農炎帝教民殖穀故號神農氏謂神其農業也又屬山氏有子曰農能殖百穀後世因名耕甿曰農其言農之義甚著而先農之稱考之於經未有紀載惟劉向五經要義曰壇於田以祀先農如社稷宏漢儀春始□耕於藉田引詩先農則神農也魏秦靜儀風伯雨師靈星先農社稷為國六神晉大始四年耕於東郊以大牢祀先農周代隋及唐所稱先農皆祭神農於帝社配以后稷即貞觀初太宗親耕東郊仍藉田壇之名垂拱中乃以藉田壇為先農開元十

九年祀神農於壇上以后稷配二十三年親祀神農於東郊配以勾芒遂躬耕盡隴上乾元二年詔去耒耕雕刻天子出通化門釋輶而入壇遂祭神農以后稷配冕而朱紘躬九推焉憲宗元和五年詔以來歲正月藉田太常修撰韋公肅言藉田禮廢又矣有司無可攷乃據禮經叅攷開元乾元故事為先農壇於藉田此先農壇之所由來也漢文帝紀二年春正月丁亥開藉田唐禮樂志孟春吉亥享先農此春月亥日祀先農之所由來也臣於是本之經佐之史核之國朝會典而為之叅酌其制即知今之於神位也則書曰先農之神蓋以神農后稷皆各有專

祀而於此則統而書之也然以頒示天下使農夫皆能曉其義則必實指其名而曉之曰某某教農之君某某勸農之官也使農夫皆得津津口頰轉相誦愛慕向往而後其用力益勤則是先農之位宜主神農而配以后稷神農居中后稷居右皆南嚮田峻以下依八蠟之祀皆東西向比於兩廡之次而位次正矣諸侯親耕於東郊則督撫以下藉田皆宜在東郊先農壇在藉田之北壇門南向中為先農壇壇高而方四面有階祭日奉神主以祀壇之後為神庫如宗廟寢室之制以安神農壇之前旁為瘞池以瘞毛血神庫之左為神倉儲藉田之穀以供粢盛酒

醴神庫之右為宰牲亭以供親割壇門外為觀耕臺臺下為藉田壇之旁別置齋室未祭而先齋既祭而燕皆於其地而壇基立矣古之躬耕在孟春元辰□之躬耕在孟春吉亥宗乎古則宜用元辰法乎近則宜用吉亥但孟春之月土雖脈發凍未全解今酌以仲春之吉亥而吉定矣其在祭器則三爵一尊酒盞三十登一鉶一簠二籩十豆十筐一俎一毛血盤一爐一燭臺二香案一祝板一而祭器備矣其在祭品天子則用太牢今督撫以下惟用少牢餘無可減爵實以酒醴登實以太羹鉶實以和羹簠實以黍稷簠實以稻粱籩實以棗栗榛菱茨鹿脯白餅

黑餅形鹽菹魚豆實以菁菹芹菹筍菹韭菹鹿醢兔醢魚醢醢醢脾析豚胸筐實以青邑量幣俎實以羊一豕一而品物齋矣若夫樂奏七章則以丁祭樂舞為之舞佾如其數迎神奏永豐之章奠帛初獻奏時豐之章亞獻奏咸豐之章終獻奏大豐之章徹饌奏屢豐之章送神奏報豐之章望瘞奏慶豐之章七闋既終而樂奏成矣未祭之先自齋宿以至於省牲省具演禮演樂祭之日自迎神以至於初獻終獻送神望瘞悉如文廟之儀而大禮舉矣位次正而必不疑壇基立而地不遷涓吉定而時不忒祭器備而知其不可假易品物齊而知其不貴殊珍樂奏

成而無有不和大禮舉而孰敢不敬而先農說於是乎畢

記藝文志之四

鼎建文廟碑記

同知柯鄧枚

學宮乃教化從出之地宜輝煌輪奐壁水環虹妥聖靈而昭文德凡臨民者之急務也但開郡初開彝疆經綸草昧諸政率由簡畧宮牆孰遑顧問前守劉公先勞是舉卜勝東郭豎正殿三楹雖土堦茅茨聊蔽風雨然庠序之設肇於此矣迨我糧憲張公前守開陽百廢俱興首詢學宮捐資庀材委屬勞經倅徐教授董其任別駕唐公統其責建櫺星門蓋東西廡崔巍大殿丹牖每垣啟聖有祠明倫有堂旋沈公復蓋以文昌祠富其所有

總鎮左都督高公特蠲金鼎而地益重諸賢是理廟貌聿新煥乎其可觀也然夫子之神座未嚴四配之公案缺如淵源洙泗兩廡之賢位未正也關閩濂洛大儒之名次無憑也名宦鄉賢之祠神無所棲而配享無從也至於籩豆之事臨時假借祝廉之器畧焉未陳且講經無地鱣堂尚懸此數者是啟我後人者也余叨贊茲土代攝郡符雖行無餘力然志樂有成祇捐清俸囑孫經倅盡心力而為之不閱月而向之未備者一一克舉無非踐諸賢未竟之成仍舊貫以繼芳名爾爾時同城文武諸君子僉曰有文昌祠不得不有魁星閣衆擎易舉不日落成是又

以眾示教點綴斯文之盛事也夫地靈則人傑又曰人事修則天運回無論誦讀四聞菁莪蔚起即衣皮茹毛穴居野處之種莫不入廟思敬將見蠻貊之鄉一變為衣冠之藪其仰副聖天子弘敷文教培育人材之至意其在斯乎敢不鐫石以垂永遠哉

修建文廟碑記

郡佐 周 炳

先天弗違後天奉若理也莫為而為莫致而致數也天下事有必至責無旁貸者理之所準數不得而囿也事所當為終於難必者數之有定理不得而爭也一旦天意作合人心鼓舞有不

期然而然者是理與數相因而至也我夫子德隆千聖道冠百王自漢以來天下郡縣設立學廟迨至本朝制禮作樂崇祀尤隆雖遐荒萬里外莫不尊之奉之無遠弗屆也此地古紅夷國舊為臨安三長官之地土司龍上登文學知名立廟行朔望禮木榱苦片茅茨土階今之倉聖祠乃其舊址也康熙六年以教化王弄安南三長官司地為開化府即設學焉知府劉訢創建大殿二十七年知府張仲信增建兩廡明倫堂三十二年知府沈寧建啟聖宮名宦鄉賢祠三十三年知府李錫鑿泮池五十二年教授李春盛重修大成殿六十一年知府吳文炎建櫺星

門及兩廡雍正三年同知佟世佑置各項祭祀銅器十二年宮爾勸知縣曹國弼重修魁閣及泮池牌坊置牌位祭器乾隆二十年知縣謝千子教授趙震典史程塏重修大成殿櫺星門並建崇聖祠道德坊二十一二兩年知府湯大賓同知季湘署知縣王元熒監生王洪嗣生員彭賢錦王人傑等倡捐明倫堂倉聖祠尊經閣兩廂齋房前後二十七間置文明坊於學宮外嘉慶十七年知府盧岫會同文武官弁紳士等倡捐銀五千九百兩建修大成門五間東西廂房六間廊房十間櫺星門一座道德坊兩座置買泮池地址修理圍牆四十四丈大照壁一座因

改任東川一切應修之處未及動作余二十一年任本郡同知孟冬文山縣典史饒貫萬言春秋二季牛羊出自八里輪流採買誠恐累及地方爰及紳士庶人捐辦祭需公田共用銀一千一百四十兩計各田租谷年得市石四十石零一斗並將小溝絞穀二石五斗阿車寨玉麥十石枯木學谷二石郃布想穀八斗共五十五石四斗併作祭需公用不復派畧里閭迨至二十二年夏舉人戴沛汪瀛貢生傅秉詡生員唐仁陳鈞曹際清王宏猷汪鳳翥監生吳從琳楊鳳翱萬明等因前工未竣稟懇教授陳瑞圖訓遵束本培介紹輿情求余接修計乾隆丁丑修建

以來至嘉慶丁丑已六十年矣考其事數應一週合其理勢難再緩是以勉從其請即於是年八月三日公同議捐將學置地基繪圖改作刻三日興工越月落成大局適有臨安之役二十三年秋復任得以始終其事共樂輸銀五千五百四十五兩建造尊經閣三間兩廡十間文昌殿三間後殿三間宮門三間兩廂六間節孝祠三間鄉賢祠三間忠義祠三間照壁二座教授署大門一間儀門一間大堂三間正房三間西廂房三間科房兩間看司一間廚房二間訓導署大門三間大堂三間大樓三間明倫堂大門三間串堂三間齋房三間碑亭三間廚房一間

倉聖祠三間崇聖殿三間文明坊一座道德坊照壁二座岳廟照壁一座挖成泮池五十丈添設神龕牌位儀杖禮器樂器陳設並桂宮匾額計門窓榻扇三百六十件週圍墻垣七十二丈以及道路溝渠階級金硃丹漆粉飾等事至二十四年六月二十二日工止時官斯土者議於郡城之南建造皇亭宮門朝房十五間昭忠祠七間囑為經理共用銀九百五十兩至十月一律修理完竣竊念閣學殿宇房舍共計一百一十間圍墻照壁一百五十丈不能不慮及歲修一事有監生李鳳崗之妻儂氏捐出董幹新街住房一百一十六間四十一戶年得租銀四十

四兩四錢監生儂廷選捐出老街住房一百一十六間五十八戶年得租銀五十四兩零共銀九十八兩零得生員李健曹正對姚思廉本署清書朱萬春安置以作歲修之費查茨竹壩田地彌補以前工價歷係以利作抵公同算清以本年之租我足不敷之數經生員吳運昌本署經書董為柱之手查明該寨人戶統有二百五十三家得租銀七十五兩三錢枯木生員王汝羹地租銀十五兩大興寺房租銀九兩共計百金以資書院膏火查馬白學田向為學租毋庸置議大壩一寨係學宮辦公之用每年僅得十餘金往往不敷即將人戶查明五十餘家所種

地土多寡不一稽戶口之貧富收租年得租銀三十九兩六錢著落生員蔣榮芳富戶蔣子麟楊德配劉世賢等名下按年交租除準該學辦開消外所餘二十四兩六錢作為學廟各處朔望香燭之費責成教授供俸春夏訓導供俸秋冬互相輪值以期永遠弗替所有春秋兩祀例應奏樂得生員王天培吳開運李恒澍曾思敬林殿榮林殿華陳學淵王樹南鄒近陽張琴陳闌陳萃徐文弼龔敬關必超鄧希哲萬昷趙煊向德劉用九周文煥楊聯舉楊聯珠楊天培馬漢卿龔中聲任漢章任高甲陳九韶王文炳黃映斗尹祥翥李友杜林天錫陳昌運李如柏張

焜余開化傅祖武樂人李國標張紹先李剛李高葉永壽陳會
元劉天儀樂舞生高舉盧炳盧清王正興梁瑞楊中和田有功
縣書吳尊亮劉占魁等以供執事張紹程鄒宗魯高文照捐銀
二十五兩交生員曹珮楊自超入於仁昌號質庫二分生息年
得利銀六兩以作春秋二祭先期樂人演習公費飯食之用謹
按丁丑秋刻日興工義勸斯舉深賴其力者監生蕭德粹也屬
意督工始終如一者吳江也而修建之費頗闕尤不能不辭勞
瘁承任終事者監生周尚廉蔣瀛饒鳳也抵墊欸項幹旋彌補
者生員任雲鴻陳九韶吳開運趙煊王再會鄧希哲學書湯若

韓明也前曾在工監修者貢生王秉義王宗文彭良臣葉春秀
葉春和庶人楊鳳朝也溯及當年以迄今日因仍損益革故更
新無非尊奉之心何敢詡以為同人之力第以僅有規模初敷
位置而已其前賢未盡之意藉衆擎易就之功統計八年前後
共得文武官紳士庶共捐金壹萬一千五百九十兩零爰誌貞
珉備敘巔末庶幾天意人心均無遺恨豈非理數相因之故有
不期而然者哉

捐置春秋祭祀田畝碑記

同知周

炳

開郡每逢春秋二祭照例領支祭祀銀置辦酒醴粢盛之用牛

羊係八里輪流採買予丙子仲秋分守斯土孟冬饒少尹復任文山細陳巔末爰集紳士人等樂輸九百九十兩零置買城南新里補里補蔓兩寨田畝共四分大小七十六坵乾地五塊草房六間統計價銀八百四十六兩襍用列後又石姓送田一坵各契照數過稅粘齊統蓋縫印歸府存案以為闔郡祭祀公田年收市石谷四十石一斗價約在百金內外計年辦牛羊約六十兩錢糧十三兩五錢零每祭幫貼縣禮房六兩年派董事生監二人輪流交管以杜專擅侵吞並免八里輪流採辦牛羊等弊其每年節省盈餘按年交當生息遇有文武會試自郡起身

之人公同核算盈虛酌給今將樂輸捐金官紳人名另載貞珉所收捐金並賣本年租谷添置田畝及收利息銀一千一百三十兩看田酒水賞號幫費升平共用銀一千三百四十兩一買彭姓田一分坐落新里補寨價銀五百七十三兩秋糧五石七斗九升年收租谷二十八石八斗計六連一連三坵東至阿千田止南至田布才馬阿姐田止西至阿滿田止北至田布保田止週圍一百九十弓二連八坵東至王有才田止南至營官莊止西至王布亂田止北至王阿子田止週圍四百八十六弓三連五坵東至王榮當與石姓田止南至馬雲祥田止西至田布

九田止北至大水溝止週圍一百四十弓四連十二坵東至水溝止南至阿受田止西至海田止北至阿猓田止週圍三百零八弓五連八坵東至康司縐田止南至阿恒田布滿田止其西至王阿猓田止北至祭需海田止週圍四百弓六連八坵東至阿受田止南至彭良輔田止西至火頭田止北至田布文王國明田止週圍一百八十三弓草房六所房後園地四塊東至申姓牆腳止南至路止西至廟牆腳止北至申姓熟地止週圍一百四十三弓一買王章田一份坐落新里補寨價銀九十兩秋糧七斗七升年收租谷三石五斗一連十二坵東至小水溝止

南至買彭姓祭田止西至買彭姓祭田止北至水溝止週圍二百六十三弓一買石姓田一份坐落里補戛寨價銀九十兩秋糧七斗三升年收租谷三石五斗大小四十坵一坵東至郜迷遠田止南至孫姓田止西至郜聯科田止北至小溝止週圍一百七十三弓一連六坵東至郜布萬田止南至田不耳田止西至牛路止北至馬布服田止週圍一百弓一坵東至高飛鵬田止南西至王致美田止西北至郜縣科田止週圍一百零八弓一連四坵內有干地一塊東至坡止南至郜老二田止西至郜布香田止北至路止四地週圍共二百五十弓一連二坵內一

坵係石萬春樂輸之田帶條糧一斗二升年收租谷七斗東至高飛鵬田止南西至郃小四賣祭田止西北至高飛鵬田止北至沙溝止共一百七十八弓一坵東至郃小四賣祭田止南至郃布香田止西至高飛鵬田止北至牛路止週圍八十六弓一買郃田氏田一份坐落里補戛寨價銀九十三兩秋糧一斗七升年收租谷三石六斗大小七坵一坵東至高飛鵬田止南至牛路止西至高飛鵬田止北至高飛鵬全祭需田止週圍九十弓一連三坵東至郃小用田止南至馬姓田止西至祭田止北至牛路止週圍九十二弓一連三坵東至郃新田止南至郃

布寧田止西至郃新田止北至郃新田止週圍三百一十七弓一坵東北至郃布文郃布寧田止西至高飛鵬田止南至馬坤田止週圍九十弓

修建開陽書院碑記

歲貢 萬重箕

安平司馬周公既修建聖廟成復就開陽書院舊址拓地整理其經營布置甚費苦心興工於道光元年十二月告竣於三年二月宏敞峻麗視舊其庠隘者迥殊又復籌備膏火俾諸生各藏修息游其間意良厚矣都人士請記其事於公公乃歉然不自任規規然固辭不許也僉曰公不自為記記之者山長宜余

不敢辭遂記之其為大門也坐壬向丙高一丈三尺寬五丈六尺兩牆橫二十八丈入門左塾房二間右塾房三間除階橫四大六尺直一丈六尺次儀庭重門一座高一丈二尺兩牆橫四丈六尺其再入也則屏門四扇除階寬四丈八尺長二丈四尺甃石階砌坦潔正直其上則羊山講堂臨焉高一丈七尺寬三丈九尺屏門四扇上刻程子四箴講堂後巒門一座除階寬三丈六尺長四丈至聖殿臨其上殿左右列掖垣清深肅穆規製協焉其堂前左廂務本堂書舍五間右廂澄心堂書舍五間天境兩旁皆有井匱出水又於澄心堂左上開重門一道則內講

堂三大間除階長一丈六尺寬三丈二尺花木蒼蔚則山長之所居息也又於務本堂右上開重門一道則午亭學舍在焉午亭公號也先是公秩滿北旋諸生立子亭學舍匾於重門志不忘也乃公復任見之急命撤去諸生不得已移額內舍公究莫能止也其舍前階除寬長與右內講堂等特舍左側列有書舍六間後則射圃顏曰君子之風與林園連接下與魁星閣通由閣出園門即大門之左塾房由右塾房入右林園門史伊二公之祠在焉其內講堂前一曲巷與詒經堂通堂凡書舍五間堂門右牆有焚字庫則諸生所捐建也堂右側牆外即本里義學

館亦公所特創也按今平山講堂昔為史公祠地因移祠舊書院處故得建講堂於茲蓋今之史公祠即昔之舊書院昔之史公祠即今之平山講堂也其至聖殿及午亭學舍內講堂悉公捐俸購得民間地基以成此宏敞峻麗之觀而民間亦以書院為培植人材之所故樂得而售之也其內講堂右側書舍及廚房地基係廩生李建後圃不願受值送入書院至本里義館之立即與書院相隣者由義館歷年失所館師修脯不敷或數年不延館師而鄉約伙頭借名攤收上下河村谷私相侵食董事者因城鄉隔遠疏忽不理百年來窮民重累茲蒙公與何涑園

太守和衷酌定即於書院膏火銀項內年抽二十四兩作館師修脯於逢春里洪烘寨王如羹控案充公地價銀數內年抽八兩作生徒紙筆之費永革攤收之弊於是義館生徒長進者即由近隣得入書院是舉也極費苦心總計書院房舍凡四十間義館三間大門一座共費銀二千餘兩勸事廩生李建曹正對向於德王再會趙煊而數年寢食其中即一庖廚一圍廁無弗位置得宜則庠生吳江公為最余不文以公論僉同不為記之後來者何從而知之夫公之不自記公之德也易曰勞而不伐有功而不德厚之至矣我公有焉

五來堂記

嘉慶二十一年丙子秋八月炳任開化府同知其廨舍自康熙三十二年經鄧司馬創建至乾隆四十二年請項重修又四十餘年半多傾圮不可復居越明年春捐修完好紳耆以炳能節儉後事也與廣文陳輯五束梅村少尉饒一峯請接修學宮炳辭不獲遂於是年八月再集同人樂輸工費十月炳有臨安之役十二月大局告成戊寅秋自瀘西回得以始終其事己卯夏工竣先是署太守盧曉峯於癸酉夏倡捐銀五千九百餘兩工未及半移權東川瓦礫木石錯雜廊廡間至是迺得工畢也是

年十月為仁宗睿皇帝六旬大壽復與同官及縉紳耆老集議以八里公所建一萬壽亭道光丙辰春並將先農社稷神祇三處壇墀牆垣捐廉修葺及移文峯塔於巽方城外魁閣亦同時拆修兼改開陽書院土木匠從前後七年至戊午春全工告竣炳於八月運銅北上矣乙酉冬復位明年遂將數年入官之學莊公田祭需諸項重為位置適有中甸之行癸亥夏間五至安平將關署修葺十五間以資棲息並定四至使民勿得侵佔因馬白關止一界碑未足以壯邊徵隨集紳耆建關門一座共三層一則為門再則為遊眺之所三則為魁星閣以啟斯土人民

不僅築關資捍衛已也爰誌額於行署曰五華堂

麻姑金廠新建西嶽廟碑記

傳曰天生五材民并用之書曰六府三事允治蓋材府者財用之所自出國家之所並重要皆天地之所生鬼神之所造化而職掌之西嶽者太白之精其位在庚當申酉之交是為金魄金旺在秋故屬於西則西岳寔掌金之權而造化夫金者惟神是司也今歲春余奉公閱廠至麻姑館於西岳神祠環視前後棖題猶新神像莊嚴堦前古樹二株蒼鬱特甚疑其廟之創建非一日矣詢之眾具云是生員盧建炳新造者也生相地於龍山

之陽因斯樹而成其堂前構山門中後殿各三楹東西兩廡俱備以為廠民祈祝之所或有公務相與講約其中焉余聞而嘉之召生而語之曰寶藏興於山貨財殖於水而主之者神也人有求於神故神能庇人神苟福於人則人宜報神余之心藏於斯久矣今爾倡此義建此祠爾知所以報矣神既有所依則人亦有所據神之福爾於茲也上可以裕國課下可以足民財爾其同得我心乎生曰唯唯既退悉計其經始之年及落成之日一切瓦石材木人工之費請余記其事而美其題余曰可夫神聰明正直而壹者也惟其聰是以無所不聞惟其明是以無聽

不照惟正直而壹是以職有專掌而人之一誠足以格之況夫天地生財以資民用川岳之奇原無盡藏聖天子膺圖於無疆則地不愛寶神不愛福山澤氣通將造物之所儲蓄用錫爾民於吾窮金氣之旺且與國運共昌而茲廟之興亦將極於千萬年而不朽矣爾諸民其謹事之遂為之顏其額並書共事之人於石云

添建開化府屬馬白馬達營記

開化為滇省極邊疆宇遼闊東西南三面界連交趾表裏屏藩一切守禦之具因地制宜分要扼險匪細故也往者沙匪構釁

交趾請援我皇王念安南屬地素號恭順爰發官兵堵禦沿邊一帶千有餘里設立汛塘以靖邊界謹出入焉丁丑冬余巡歷府屬邊隅地方閱額設汛塘官兵星羅碁布區宇劃然井井有條有理惟馬白汛南三里許賭咒河北岸上立碑亭為中外分壤之區撥兵五十名常川看守然未設有營房各兵自蓋草房不足以供棲止馬達地方駐紮千總一員帶兵一百名亦未建有兵房弁兵俱借居隣近村寨竊自揣度所應添設房屋之處回署曰會商總鎮王公公先巡視諸處意見相同因詳請添建以便住守余與公乃捐廉俸飭文令購料鳩工於馬白碑亭處

所蓋造官廳三間草房十二間與守界兵丁住宿其馬達軍營舊有各官自搭草房九間新添土坯草房二十間以供棲止二共添建房屋三十五間總計銀一百五兩足役也蓋因弁兵久戍露宿瘴雨蠻煙之中何堪拮据將荼之苦余與公經營酌量聊為此舉雖未即為安內攘外之鴻規然用以肅守圉而壯嚴威庶幾有為裨乎公曰是不可以無記余乃抽筆而書之

員女林修貞姊妹記

縣屬中區木廠街林氏有二女焉長女名修貞次名修志不幸怙恃早失時修貞年甫一十二歲妹修志始八歲有孤弟僅四

歲耳最可憐者妹眇一目弟啞啞此人情之最難堪者也修貞欲撫弟成人續宗祀矢志靡他以針黹作糊口計後數年修貞漸長成人殊該族伯叔輩存不良將修貞暗賣與人囑渠搶成親修貞偵知大懼自念雖係女流仔肩甚重倘我為人搶去孤弟與弱妹何人撫持撫持無人不免流為餓莩林祀之存絕繫之思及此益怖而匿跡愈深遂脫虎口歷盡千辛萬苦十有餘年竟撫弟成人為之婚娶貞與眇目之妹矢志奉佛迄今啞弟有子二復見孫貞與妹皆皓首矣地方人士皆敬仰之聞於官賜給匾聯匾曰金石同貞聯曰撫啞弟以成家宗綿一線偕眇

妹而繡佛貞表千秋云云茲逢續修縣志有段吉熙先生述其巔末聞之者莫不崇拜焉故志之以表其貞之可敬也

老君山記

唐世楷

楷高坡人也而心卻不憚其高回憶少時入塾每當重九聞同窗有登高之說於焉從遊於最高之地酌酒開樽時或披襟以當雄風時或乘涼而覽煙雲載言載笑詠而後歸洵可樂也迨年壯科舉未遂始讀青囊堪輿諸書有山水癖凡附近崇山峻嶺靡不選勝登臨而惟以邊關有名之老君山未得絕頂以觀其起伏為憾歲在戊申值上巳良辰爰約二三知己虔誠齋沐

備糗糧軍器束裝行李首途一站七十餘里歇老巢坡次早自老巢坡暗祝土神凡猛獸毒蛇請勿驚擾乞畢由山麓尋蹊而上紆曲宛轉步履維艱約九點鐘始抵大木廠維時烏雲四合雷鳴大雨乃晚炊而止宿焉夜靜寂寞惟聞水聲潺潺山鳥悲鳴有呼張子房者其聲淒楚須臾黎明遙望高山曠野舉足又行於是過溝澗披蒙茸究之竹木迷離荊棒道阻左顧右盼無路可通只得稍息片刻適於巖畔遇箐鷄鷓伏孵卵不驚以手探之馴如也自此匍匐蛇行扳藤爬巖聯袂而登於穹隆之上俯視衆山皆小地闊天空萬象森羅煙村莫辨少焉風起帽落

忽見彩雲朵朵拂面飛來余與諸人且行且止見一朝天奇特大石約高二丈其尖若筆腳三若鼎下可容牀中鋪細草渾如野物寄宿之所預科前去漸入佳境必尋中心正頂而休焉無如盪胸一望尚有無數峯巒岡阜壁立如削成叢聚嶙列於大壑之中前後左右巖泉繞護幽深莫測雖曰瞻之在前由此達彼甚近而且易也夫何以可望而不可及哉於是回顧所到之處高則高矣然窺其形勢不過及其闕而猶未入其門也嗟呼仙境非遙無緣賞玩其抱恨為何如耶正躊躇間午風大作腳立不定且腹中飢渴隨行者不禁悄然而悲余亦悚然而恐懷

乎其不可留也乃返而覓諸野火沿燒空地行行止止至山腰尋溪水以作午餐爾時日已斜曛乃倉惶就道所謂前此探幽涉險秉興而來今則手足奔忙敗興而返也惜哉

多勝樓記

龍陵

張自明

馬關市場沿山脊而居欹曲狹斜無改善可能市之中心稍廣濶邦人乃建經樓於其間每於市聚之日則擁塞無插足處樓下舊有水池污穢特甚署氣蒸騰衛生大礙初議欲去之又慮木石散失遲不定今秋重九余偶遊柳塘見東岸林木蔚然最適宜於點綴乃決移經樓於其地委樊君成純董其事籌修費

界之樊君軍人重實際即日督工遷蓋經樓僅四柱孤立無迴廊窻戶復添料構築頓改舊觀是舉也不惟除市場之障礙而便商務之交通且於柳塘之間增勝概而資遊憩誠一舉而數美備矣樓成之日諸士紳登臨四顧則見羣峯聳峙一水潏洄雲影天光與斯樓相掩映夾岸人家錯落如繪不啻天開畫本諸紳欣然曰吾邑又多一風韻之地矣余曰斯樓既成未命名即以多勝名之亦記實之一道也因作二絕句以壯之後之人或不嫌為多事云時辛未年十月既望龍陵張自明渾菴撰於師竹樓

遊仙人洞記

前人

辛未浴佛前三日樂君成川約遊仙人洞晨先曦微出郭南行十餘里至花格村原名花枝格林木青蒼人家離落遙見成川立牆陰乃下馬相將入小園休憩園中菓樹如火燎枝葉盡脫詢之成川云村中多草屋日前遭回祿延燒數十家竊幸牆壁高厘其不被於難者幾希矣余喟然曰草屋之害大矣村之人曷亟謀改善勿因噎廢食悔無及茶罷復上馬沿山行過賭咒河一路青杉刺天小峰秀削如圭壁人行凹道中蹄聲得得山木應響不五里至仙人洞洞據一石岩高百餘丈洞口則在岩

腹怪石猙獰欲擢人竹柏森森佈滿岩麓石級欹曲不正穿茂林而上數休始至一黃犬臥山門見人欲吠嫗止之余乃攝衣入仰視樓閣則倚岩立柱高建三層碧民雕楹狀甚奇麗惜年久失修風雨剝落耳閣之下層嫗居之廚灶匡床相近咫尺無空隙插足處中層惟一遊廊三面危欄以供進香者之遊憩旁鑿一小道經奔岩間僅容趾不易行行則心搖股粟惟恐其欲墜岩上小樹垂蘭點綴成趣蘭正怒開一枝與簷鈴相向風送蘭香鈴聲丁冬然若知客之至而故為吟弄也閣中雖置有扶梯長且初登之頗苦上一層直逼洞口閣本無樑用鉄索縛椽

木於岩石上出兩角於半空山雨來時岩乳淋漓而下雖曰妙思亦險矣洞門有龕供觀音像龕之後即洞不甚深頂上石筍垂垂殊有緻中立一石柱如撐華蓋亦岩乳滴成者龕之旁亦有柱粗蠹無可觀惟石工就岩石雕獅象各一甚精洞本陰黑非燃炬不能知究竟加以寒濕逼人不宜久坐乃出而開窻遠眺但見群山朝拱排闥送青對山長而圓小杉羅列無萬數蒼翠可愛山上綠草成茵一牧子軀數犢於其間披青蓑吹短笛興致悠悠如觀三王圖畫襟盡滌幾不知此身來自何所閣之左開一小門可通山頂從岩直上頗險峻稍不慎墜萬丈澗

矣從者爭欲登余戒之願謂成川曰洞之景物其只此乎成川曰山之麓當有可遊者乃攜杖下山折而左至仙人田田在奔岩下岩乳淋漓滴成墾塍殊整齊田可十餘坵如碗大曰水蕩漾呈黃金色村人云此山夙產金礦昔曾開採之未知確否惟與塍天然象形亦奇績也轉身過右側則見岩口開張狀殊可怖中有一石柱成兩截上截由岩頂下垂長丈餘下截自地挺出相距咫尺村人告曰此九龍口也柱若相接必生異前人曾敲斷數尺日積月累又將長成矣余曉之曰岩乳滴成耳初淋至地上陸續高起岩上之漿亦漸結下垂是以相接何異之有

旁亦有洞不深洞內石卵無數余拾而試之體質堅重村人復謂曰此龍卵耳余笑曰如汝所言龍將填滿巖壑矣可不懼哉雖然深山窮谷中每多奇絕境物人自不易知而名之耳正話間閣中酒肴已備復返而大嚼因願同人曰此南中勝趣也願邦人共保之移時夕陽西下幽鳥啼林乃欣然而返歸騎至花枝村欲與成川作別從者云當醉臥洞口未回天已昏暗馬嘶聲急始縱轡回縣入關已萬家燈火矣次日書南中勝趣四字託成川鏤於岩石復濡筆以記

遊挹青閣記

前人

西關之外不數伍三峰鼎峙圓而秀峰不甚高起伏有致中儲一池周圍數十丈池水清澄可愛邦人建一閣於池之中心築小堤以通往來堤邊桃柳成陰花時爛熳如雲錦水中游鱗成隊而荷葉田田誠消夏樂地也奈昔年地方多故摧殘幾盡不獨邦人惜之履斯土者亦莫不共惜之夕陽將西余偕劉君柱臣聶君直齋散步憇於閣仰視挹青額為王堅所書旁有數聯不省記亦無可以記閣外花磚佈置成欄可俯而觀魚四面竹柏參差臨風招颭池旁復有小寺甚□余謂柱臣曰物之興廢雖有常非人事亦天也可勝慨哉相與信步出閣登小峰而望

但見是山天矯自海龍山而來旁結壽山如老人舒衣帶而坐阮發營盤山若玉簪由山半中抽而下至玉皇閣而一仰首於足而結此之峰復向鄔家墩飛舞而去其靈秀實難比擬而此峰此池堪輿所謂鶴膝也天池也信哉斜日阮下萬山已暝清風習習飄襟袖獨留連不忍去聶君家近關門邀入茶話始樂月而歸因草此以記所見龍陵張自明識

遊大龍潭記

前人

馬關自去秋以至今夏潁雨未降農民苦之縣城飲料賴龍潭之水以供取汲然遠在十餘里外一路截流灌溉頗感困難市

民又苦之余於今春來長斯土目擊諸種狀況乃偕達三超光溯流往探道徑營盤山至太陽坡觀石樹石骨露半面如古木樸地不事雕鑿根株畢具亦奇跡也沿溝討源轉過二三山脊復溯流以行入山愈深溪流愈急比至源頭但聞活活之聲阮不見潭又不見水惟一石洞黝然在望心疑之達三告曰潭在山腹水在洞底由洞可至潭殊不易行耳輾轉探尋始知前人以石砌溝跨溪而過日久山洪發漲沙堆石聚遂成伏流超先曰馬關近城十餘里鄉村田畝均賴此水舍此無以為活達三又曰嘗聞鄉中老人閒語潭水甚大分流他處者較此尤培之

以一木板即可以截取而來惟不易出入奈何余躍然曰果如君言何不阻彼而濟此乎果有此水量即開山以工作之亦萬無之利工程多寡夫何計因切囑達三倩能入潭者先往探底細三諾之超先復引至一洞寬可一席地石筍垂垂殊有緻旁一小洞深黑不能入洞口鏤海龍山三字韓熙華書字作魏體無可觀韓亦清末任斯土者山深目短岩阿露濕相與尋舊路而歸歸途男女雜沓攘攘熙熙步山椒而去始知是日為市聚之期云

石臼石鐘合記

張自明

造物之奇有非出人意料者非奇於物之高且深而奇於各有天趣耳馬關城東太陽坡之石樹邦人已習言習見之且名其景以歌詠之余亦有小詩以點綴之惟鄔家坡之石曰賭咒河之石鐘無人記之述之豈造物亦有顯晦歟抑石曰石鐘不若石樹之奇歟以余觀之石樹之奇未若石白之奇尤未若石鐘之奇也石白體質鏗鏘天然生就一石而生數十曰曰有大小其圓潤非巧匠所能辦承玉露而盛天漿豈將待補天而浴日乎造物之功深矣石鐘則倚水而居懸掛奔岩中雖曰水乳交結而體態堅實邦人嘗以石叩之其聲洪而遠響徹數里外是

天亦有不平而故為使之鳴於無耶抑無之人曠曠夢夢而使之驚之覺之耶造物之意深矣石樹之名前人已名之而此曰此鐘獨埋沒天壤間無人名之必待余之至而名之耶余既知而見之誠為三生之幸乃作白鐘合記時辛未冬十月也